

高雄小故事

鳳山縣署的老茄苳——
「曹公巨樹」

撰文／王梅素



茄苳樹是咱臺灣本土常看、實用的樹種，有人會挽葉仔來燉茄苳雞，予囡仔食開脾；樹籽嘛會啞（siānn，引誘）鳥仔來啄食，替咱遮蔭（tsáh-ńg），滋養土地，守護共存的生態。鳳山縣署的老茄苳，恬恬（tiām-tiām，靜靜）看咱世代的流轉，伊是咱歷史的見證者。

林爽文事件後（1788 年），原底佇左營的鳳山縣城被攻陷、縣署受焚毀，致使規个縣城愛遷徙（suá）到今仔日的鳳山區，遮就換號叫「鳳山縣新城」，新城縣署就來設佇即馬（現在）的曹公國小，佇縣署的大門前種了兩欉茄苳樹，其中一欉猶存活到今。

日本人來了後（明治 28 年〔1895〕），初期佇遮做辦公廳，佇明治 31 年（1898）日本人普設小學校，「鳳山尋常高等小學」就佇同年 9 月設立。到終戰後改做「鳳山示範國民學校」，佇民國 48 年（1959）閣（再）改做「鳳山國民學校」。抑（也）因為學校對面是曹公祠，為著感念曹謹開圳，造福人民，就閣將校名改做「曹公國小」到今。留佇校園內的這欉茄苳樹，嘛佇民國 80 年（1991），予校長蔡振賢認為有歷史紀念價值，就共（kā）樹名號做「曹公巨樹」。

民國 100 年（2011）「曹公巨樹」著著（tióh-tiò，染上）白龜蠅（病蟲害的一種），樹葉仔全變黃，學校



圖 1 參觀「曹公巨樹」的遊客
影像來源：筆者 2013 年 10 月 4 日拍攝。

緊倩（tshiann，請）人來將（kā）樹仔剃頭、掖（ā，撒）藥仔。好哉在！龜蠅處理煞，伊精神猶原在，閣重發新葉仔，嬌（美）起來。佇咱高雄市「曹公巨樹」是特定的紀念樹仔，編號 51 號。雖然是受保護珍貴的老茄苳，毋閣（不過）我煞有淡薄仔（些微）感覺伊真孤單。心內咧想……若咱人無人看顧、無人陪伴，身體閣卡勇嘛會帶心命（心理鬱悶成疾）。早期學校為著欲保護樹身避免人為恰天災的損壞，用紅毛土鞏（khōng，築）柱子共（kā）箍圍咧，久來學生囡仔恰來學校的人煞袂閣去親近、其他樹種袂佇遮生炭（生育繁殖），看起來就若狗仔額頸仔用鏈仔綁咧全款，毋知當時（tâng 時，何時）才有故（tháu，解）放的一工。

閣過三冬外（2013 年），老茄苳樹身煞一片（編註：一片，pîng，一邊）爛，學校發現將爛去的先挖掉，揣（編註：揣，找）防疫的人來看，In 用若糊仔的藥仔糊幾仔層，閣用雨衫（mua，編註：雨衫，雨衣）佇身軀蓋。唉！老樹是咱珍貴的資產，伊咧喝咻（吶喊）！伊閣破病矣！我去共（kā）看，掀開雨衫，爛塌（lap，塌）的樹身，看著是會著青驚。學生囡仔問我是咧看啥？我講我來看老茄苳、來陪伊，叫囡仔以後嘛愛來樹仔跤耍、來遮覓（bih，躲藏），做伙來惜伊，予伊會使閣食百二。



圖 2 七个曹公囡仔，牽手圍箍仔，守護蓋雨衫的「曹公巨樹」

影像來源：筆者 2013 年 9 月 27 日拍攝。

本文榮獲「2013 年高雄小故事」第二級佳作